



Uunga siunnersuut: Takornaviartitsinermut, sumiiffinni nunami aalajangersimasuni zone-nut agguaasarneq il.il. inuussutissarsiutigalugu ingerlatsinermi aammalu killeqartunik sumiiffiit ilaanni angalaarsinnaaneq pillugit Inatsisartut inatsisaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut

Naligiissitaanermullu Naalakkersuisoq)

(Siullermeerneqarnera)

Qujanaq Naalakkersuisut siunnersuummut.

Tamatta isumaqatigaarput, takornariaqarneq isertitassatut pingaarutilinnut annertuumik inississinnaammat. Nuummi Ilulissanilu atlantiku qulaallugu ikaariaannaallugu mittarfissuarnik sanasoqarnissaanik aalajangertoqarmat sulineq aallartipparput, nunarput takornarissanik tikiqqarnissaa ajornannginnerulerujussuurtussanngorlugu sinaakkusiinitsigut. Taassumalu kingunerisussaassavaa, takornarissat amerlanerusut tikittalernerat, taamaattoqarnissaalu takussutissaqalereerpoq.

Tassunga atasumik pingaartuuvoq, uagut nunatut takornarissat pissutsinik pitsaasunik misigisassanillu pitsaasunik neqeroorfigisinnaanissaat. Soorunalumi aamma pingaartuuvoq, uagut Kalaallit Nunaanni nunaqavissut, sapinngisamik annerpaamik takornariaqarnerup annertusineranik aningaasanik isertitaqartut.

Taamatuttaaq pingaartuuvoq, avatangiisitta eriagisassap mianersuuttuarnissa imaalillugu, Kalaallit Nunaat takornarissanik tikitassatut pilerinartuujuarlunilu pissanganartuaannartunngorlugulu. Taamaammat isumassarsiatsialaavoq, zoninut agguataarisinnaaneq, killilimmik imaluunniit pallinneqaqqusaanngitsunik, pingortitatta eriaguarnissaa siunissamut qulakkeerumallugu.

Demokraatinut tikkuassallugu pingaaruteqarpoq, qulakkiissagipput, inatsisip nutaap ineriartorneq pitsaasoq naallerassanngimmagu. Qulakkeertariaqarparput, avataaniit suleqatitsinnut sulii pilerinartuarnissaa takornariaqarnermut aningaasaliinisaq inuussutissarsiummi tamakkiisumik isertitat annertusarumallugit. Taamaammat iluarisimaarparput, Naalakkersuisut tusarniaanermi akissutit tusarnaarsimammatigit takornarialerinermik ingerlatsinissamut akuersissuteqarnissamut pingajorarterutaat marluk kalaallinit pigineqassasut pilersaarutaajunnaarsinneqarmat. Piumasaqaatip taamaattup qularnanngitsumik kingunerisimasinnaassaluarpaa, avataaniit suleqataarusuttut aningaasaliinissaasa pingitsoornerat. Tamanna tunngavigalugu taperserparput, Naalakkersuisut piumasaqaat oqilisarumagamikku, piginneqatigiissut kalaallinit affaa sinnerlugu pigineqassasunngorlugulu. Piumasaqaat naleqquttuuvoq pingaaruteqarlunilu nunaqavissut annertunerpaamik isertitaqarnissaannik qulakkeerissalluni. Uagununa nunarput. Uagulluuna nunaqavissut, isertitat annerpaartaanik tiguisussat. Piginnittuusinnaaneq kisimik pingikkaluarlugu isumaqarpugut Naalakkersuisut aamma qulakkeertariaqaraat suliffeqarfiit kiffartuussinissamik isumaqatigiissutillit taamatullu suliffeqarfiit



inuiaqatigiit pigisaat namminersortunut ineriartorusuttunut unammillissanngitsut. Ilumoorinnaanngilarmi inuussutissarsiorusuttut nunaqqatigut isiginnaartuuginnartinneqarnrat suliffeqarfinningaanniit nunatta karsia qularnaveequtigalugu ingerlarsortuniik. Tamanna naligiittumik unammilleqatigiinnertut taaneqarsinnaanngilaq unittariaqarporlu.

Pissusissamisoorpoq takornariaqarnermik ingerlataqarnissamut akuersissummik piunasaqaateqartoqalernissaa. Akuersissummik pissarsinissamut piunasaqaatit taperserpagut, tassa takornarialerinnermut akuersissummik pissarsissagaanni sillimmaasiinerit sillimaniarnermullu pilersaarut pisariaqartut pigineqareersimassammata akuersissummik tunineqannginnermi.

Taamatuttaaq iluarisimaarnarpoq, immikkut akuerineqarnissaq periarfissanngussammat imaasilluni, nunaqavissut, saniatigut takornariaqarnikkut ingerlatsisinnaanngorlugit, akuersissummik peqaqqaaratik. Taamaattumillu Naalakkersuisut siunnersuutigaat, immikkut akuersissummik pissarsissagaanni innuttaasup takornarialerinnermi isertitai ukiumut 50.000 koruunit qaangissanngikkai. Tamanna Demokraatinit kissaatigaarput, misissorluarneqassasoq, killissarititaaq naammannersoq imaluunniit qaffasinnerusariaqarnersoq.

Assersuutigalugu takorloorneqarsinnaavoq, inuussutissarsiutigalugu piniartup isertitaminut tapertatut takornarissanik qimussiussinissamik neqerooruteqarusuttoq. Qimussiussineq taamaattoq takornarissanut pilinarluinnartuuvoq, taamaalillunilu inuussutissarsiutigalugu piniartup akigititani qaffasitsissinnaallugu. Uani piniartumut namminermut aammalu inuiaqatigiinnut tamarmut uggornassaaq, inuussutissarsiutigalugu piniartup isertitaqarnissamut killigititaasoq sukkasuumik anguppagu, taassumami kingunerissammagu, inuussutissarsiutigalugu piniartup isertitai annikinninngussasut taamatullu akileraarutinut akiliutai ikinnerullutik.

Aammattaaq Demokraatinut tikkuassallugu pingaartuuvoq, isumaqatigigatsigu, kaffillernerit, qilaatersornerit, uaajeernerit allallu kulturimut tunngassuteqartut akuersissuteqarnissamik piunasaqaasersorneqanngimmata.

Naggataatigut oqarusuppunga, una inatsit inuiaqatigiinnut takornariaqarnermik sullissisunut takornarianullu pitsaanerpaassariaqarmat. Taamaammat pingaaruteqarluinnarpoq, suleriaqqinnissatsinni soqutigisaqaqatigiit assigiinngitsut tusarnaassagatsigit siunnersuutillu suliarinerani pissusissamisuunngitsoqassappat aaqqiinissamut ammanissarput. Maluginiarpara, ataatsimiititaliami suliarinissaanut piffissaqarluartugut kaammattuutigerusupparalu, piffissaq atorluarneqassasoq tamatsinnut ajunngitsusaaq anguniarlugu.

Siunnersuut taamatut oqaaseqaaserlugu Inuussutissarsiornermut- aamma Aatsitassarsiornermullu ataatsimiititaliami suliareqqinneqartussatut innersuupparput.